



Broj:11/01-14-32606/17  
Sarajevo, 6.11.2017. godine

Na osnovu člana 66. Zakona o organizaciji organa uprave u Federaciji Bosne i Hercegovine („Službene novine Federacije Bosne i Hercegovine, broj 35/05), a u vezi sa članom 86. stav (1) tačka 8. Zakona o zdravstvenom osiguranju („Službene novine Federacije Bosne i Hercegovine“, br. 30/97, 7/02, 70/08 i 48/11) ministar za obrazovanje, nauku i mlade Kantona Sarajevo donosi

## **UPUTSTVO ZA OSTVARIVANJE PRAVA NA ZDRAVSTVENO OSIGURANJE UČENIKA I STUDENATA**

### **I**

#### **(Predmet Uputstva)**

Ovim Uputstvom se propisuje procedura ostvarivanja prava na zdravstveno osiguranje učenika i studenata putem Ministarstva za obrazovanje, nauku i mlade Kantona Sarajevo (u daljem tekstu: Ministarstvo), obrazac zahtjeva za zdravstveno osiguranje, potrebna dokumentacija, te postupanje Ministarstva po zaprimljenim zahtjevima.

### **II**

#### **(Pravo na zdravstveno osiguranje)**

Pravo na zdravstveno osiguranje putem Ministarstva, u skladu sa članom 86. stav (1) tačka 8. Zakona o zdravstvenom osiguranju, ostvaruju učenici za vrijeme redovnog školovanja u osnovnim i srednjim školama, odnosno redovni studenti za vrijeme studiranja na višim i visokoškolskim ustanovama koji su državljani Bosne i Hercegovine (u daljem tekstu: učenik/student) s prebivalištem na teritoriji Kantona Sarajevo, a nisu zdravstveno osigurani kao članovi porodice osiguranika, a najduže do navršene 26. godine života.

### **III**

#### **(Uplata doprinosa)**

Ministarstvo na ime doprinosa uplaćuje 20,00KM po prijavljenom licu, kako je to utvrđeno u članu 10. tačka e). Odluke o utvrđivanju osnovica, stopa i načinu obračunavanja i uplate doprinosa za obavezno zdravstveno osiguranje na području Kantona Sarajevo („Službene novine Kantona Sarajevo“, broj 29/09).

### **IV**

#### **(Zahtjev za zdravstveno osiguranje)**

- (1) Zahtjev za zdravstveno osiguranje učenik/student dostavlja Ministarstvu putem pisarnice Kantona Sarajevo, ul. Reisa Džemaludina Čauševića 1.
- (2) Zahtjev se podnosi na obrascu datom u Prilogu broj 1. i čini sastavni dio ovog Uputstva.
- (3) Uz Zahtjev učenik/student dostavlja i sljedeću dokumentaciju:
  - a) Nova zdravstvena knjižica;
  - b) Potvrda o redovnom školovanju/studiranju;
  - c) Kopija lične karte, za punoljetna lica;



- d) Kopija rodnog lista, za maloljetna lica;
- e) Prijava prebivališta (CIPS prijava);
- f) Uvjerenje iz Porezne uprave Federacije Bosne i Hercegovine da se podnosilac Zahtjeva ne nalazi u Jedinstvenom sistemu registracije osiguranika;
- g) Uvjerenje iz Porezne uprave Federacije Bosne i Hercegovine da se roditelji/staratelji ne nalaze u Jedinstvenom sistemu registracije kao osiguranici;
- h) Odluka nadležnog organa o starateljstvu, odnosno imenovanju staratelja (za učenike/studente bez roditeljskog staranja).

(4) Učenik/student čiji roditelji/staratelji imaju prijavljeno prebivalište/boravište izvan Kantona Sarajevo ili nisu državljani Bosne i Hercegovine, pored dokumentacije iz tačke IV ovog Uputstva, potrebno je da dostave prijavu prebivališta/boravišta roditelja/staratelja ili ovjerenu kopiju pasoša.

(5) Ako roditelji ne žive u porodičnoj zajednici, a prebivalište/boravište jednog roditelja je nepoznato ili je nedostupan, učenik/student je obavezan uz dokumentaciju navedenu u tački IV ovog Uputstva, dostaviti i kućnu listu ovjerenu od strane nadležnog općinskog organa.

## V

### (Rješenje o priznavanju prava na zdravstveno osiguranje)

(1) Po dostavljanju uredne i potpune dokumentacije iz tačke IV ovoga Uputstva, Ministarstvo donosi i izdaje rješenje učeniku/studentu za priznavanje prava na zdravstveno osiguranje i popunjenu zdravstvenu knjižicu.

(2) Rješenje iz stava (1) ove tačke, uz prijavu osiguranja, Ministarstvo po službenoj dužnosti, dostavlja Poreznoj upravi Federacije Bosne i Hercegovine.

(3) Ako učenik/student dostavi neurednu ili nepotpunu dokumentaciju Ministarstvo ga poziva da upotpuni zahtjev u roku od sedam dana od dana obavlještavanja.

(4) Ako u navedenom roku učenik/student ne dostavi potpunu i urednu dokumentaciju, Ministarstvo će donijeti i učeniku/studentu dostaviti rješenje kojim se odbija priznavanje prava na zdravstveno osiguranje.

## VI

### (Ovjera zdravstvene knjižice)

Nakon preuzimanja Rješenja o priznavanju prava na zdravstveno osiguranje i zdravstvene knjižice, učenik/student se upućuje u jednu od poslovnica Zavoda zdravstvenog osiguranja radi ovjere zdravstvene knjižice.

## VII

### (Obaveza učenika/studenta)

(1) U periodu ostvarivanja prava na zdravstveno osiguranje učenik/student je obavezan najkasnije u roku od 30 dana od početka školske/studentske godine, dostaviti Ministarstvu potvrdu o redovnom školovanju/studiranju i Uvjerenje iz Porezne uprave Federacije Bosne i Hercegovine da se roditelji/staratelji ne nalaze u Jedinstvenom sistemu registracije kao osiguranici, ne starije od 7 dana.

(2) Ukoliko učenik/student ne dostavi potvrdu o redovnom školovanju/studiranju u roku navedenom u stavu (1) ove tačke, Ministarstvo će izvršiti odjavu zdravstvenog osiguranja tog učenika/studenta.

## VIII

### (Dobrovoljni prestanak korištenja zdravstvenog osiguranja putem Ministarstva)

(1) Ukoliko učenik/student odluči da dalje ne koristi ovaj vid osiguranja iz bilo kojeg razloga, dužan je u roku od 7 dana podnijeti zahtjev Ministarstvu radi izrade i izdavanja rješenja o prestanku priznavanja prava na zdravstveno osiguranje.

(2) Rješenje iz stava (1) ove tačke uz odjavu osiguranja Ministarstvo, po službenoj dužnosti, dostavlja Poreznoj upravi Federacije Bosne i Hercegovine.



## IX

### (Odjava zdravstvenog osiguranja po sili Zakona)

Nakon što prestanu postojati Zakonom propisani uvjeti za ostvarivanje zdravstvenog osiguranja iz tačke II ovog Uputstva, Ministarstvo po službenoj dužnosti donosi rješenje koje uz odjavu osiguranja dostavlja učeniku/studentu i Poreznoj upravi Federacije Bosne i Hercegovine.

## X

### (Stupanje na snagu)

Ovo Uputstvo stupa na snagu danom donošenja, a biće objavljeno na zvaničnoj internet stranici Ministarstva.


**MINISTAR**

*Prof. dr. Elvir Kazazović, s.r.*



web: <http://www.mon.ks.gov.ba>  
e-mail: [mon@mon.ks.gov.ba](mailto:mon@mon.ks.gov.ba)  
Tel: + 387 (0) 33 562-128, Fax: + 387 (0) 33 562-218  
Sarajevo, Reisa Džemaludina Čauševića 1





**PRILOG BR. 1**

**ZAHTJEV ZA ZDRAVSTVENO OSIGURANJE**

Molim da mi se, u skladu sa članom 86. stav (1) tačka 8. Zakona o zdravstvenom osiguranju („Službene novine Federacije Bosne i Hercegovine“, br. 30/97, 7/02, 70/08 i 48/11) odobri pravo na zdravstveno osiguranje.

O sebi dajem sljedeće podatke:

Ime i prezime	
Ime jednog roditelja	
Datum i mjesto rođenja	
Adresa i broj telefona	
Naziv škole/fakulteta	

Uz Zahtjev prilažem sljedeću dokumentaciju (zaokružiti priložena dokumenta):

- i) Nova zdravstvena knjižica;
- j) Potvrda o redovnom školovanju/studiranju;
- k) Kopija lične karte, za punoljetnike;
- l) Kopija rodnog lista, za maloljetnike;
- m) Prijava prebivališta;
- n) Uvjerenje iz Porezne uprave Federacije Bosne i Hercegovine da se podnosilac Zhatjeva ne nalazi u Jedinstvenom sistemu registracije osiguranika;
- o) Uvjerenje iz Porezne uprave Federacije Bosne i Hercegovine da se roditelji/staratelji ne nalaze u Jedinstvenom sistemu registracije kao osiguranici;
- p) Odluka nadležnog organa o starateljstvu, odnosno imenovanju staratelja (za učenike/studente koji imaju staratelja);
- q) Ostalo.....

Podnosilac zahtjeva

U Sarajevu, .....

ZZO – Obr 1

